

四庫全書

經部

欽定四庫全書

經部

匡謬正俗

目錄
卷一至五

詳校官國子監祭酒臣覺羅吉善

洗馬臣王坦修覆勘

覆校官中書臣康儀鈞

校對官學正臣湯垣

謄錄舉人臣李達泰

欽定四庫全書

經部十

匡謬正俗目錄

小學類一訓詁之屬

卷一

論語

攘

風

架

夾

籀

甲

背

溥

衡

忉

矜

央

號

享

賚

莫

卷二

尚書

易

御

獸

夾

開

惟

烏呼

卷三

禮記

奉

拾

禹字丘區

曲禮注字作雨所見本異

予

葬

離

祝

五方之兵

殺

楊

羶

辟

溫

嘯

蝸

卵

有

孽

不至

素食

卷四

春秋

俘

肉食

寺人

鵠

軒

王夫

閑閣

草創

卷五

史記

漢書

尚

赦令

緇

遁巡

游衣

郎署

便面

柱

非一

葬

阡

桓

辟彊

閼氏

隄

陂池

楊豫

計偕

戎昭果毅

宋書

熹

錫趺

蒿艾

卷六

圻

副

翹

恫

洋

略刃

髒

窠

什器

揉

絢

貶

跌

俾

底

剛扛

欠

木鍾

若柯

楊

椎

鐮

埒

聆

誼議

名字

複名

巽

草馬

卷七

反

禡

怠

免

黃卷

隸齒

尸韓

彡髟

奚斯

假

歌

渚

河

穰

上

激

中

兔

雌

暴

上

幹
筦

貫

振

池
羶

渴
罩

幾
頭

怒

殿研

差

兩量

章估

卷八

受授

西

番

句鉤

斃

逢

縣褰

苟

鄙人

被庫

募姑

砑麼

骨鹿

歷底

門限

替

樂石

享

迴

上下

孟仲叔季

局

示

仇

愈

舍

飭

陵遲

獻左氏傳

禽

關雎

殊死

杖目

無恙

圜稱

嬰輿

稻秫稷

沙苑

苦菜

倉米

羹臠

臣等謹案匡謬正俗八卷唐顏師古撰師古
名籀以字行雍州萬年人歷官秘書監事蹟
具唐書本傳是書永徽二年其子符璽郎揚
庭表上於朝高宗勅錄本付秘書閣卷首載
揚庭表稱稿草纔半部帙未終蓋猶未竟之
本又稱謹遵先範分為八卷勒成一部則今
本乃揚庭所編宋人諸家書目多作刊謬正
俗蓋避太祖之諱改匡為刊也前四卷凡五

十五條皆論諸經訓詁音釋後四卷凡一百二十七條皆論諸書字義字音及俗語相承之異考據極為精審師古一代通儒而據於習俗不能知音有古今又不知齊梁以前無平仄四聲之別故其註漢書動以合聲為言遂開後來叶音之說如謂葬音臧誼議音宜反音扶萬反歌音古賀反彛音上聲怒有上去二聲壽有受授二音迴音戶瑩反皆誤以

今韻讀古音如穰音而成反上音盛又音市
郢反先音西逢音如字不讀龐皆誤以古音
讀今韻未免千慮之一失耳古人考辨小學
之書今皆失傳自顏之推家訓音證篇外實
莫古於是書其邱區禹宇之論韓愈諱辨即
引之知唐人已絕重之矣戒山堂讀史漫筆
解都鄙二字詫為獨解不知為此書所已駁
毛奇齡引書序倂厥寶玉解春秋衛倂詫為

特見不知為此書所已引洵後人證據終不
及古人有根柢也乾隆四十一年十二月恭
校上

總纂官臣紀昀陸錫熊臣孫士毅

總校官臣陸費墀

匡謬正俗進表

臣揚庭言臣聞纖埃不讓嵩華所以極天涓流必納溟
渤所以紀地況乎業隆學海義切為山庶進簣於崇高
思委輸於潤澤恭惟皇帝陛下誕膺睿圖光臨大寶隆
周比迹遠邁成康炎漢儔功近超文景時和玉燭龍圖
薦於長河道包金鏡龜書浮於清洛收羽林之靈簡俾
備蓬山采汲冢之舊文咸歸延閣一言可善屢動宸衷
九術不遺每天睠臣亡父先臣師古嘗撰匡謬正俗

藁草纔半部帙未終以臣疊犯幽靈奄垂捐棄攀風罔
及陟岵增哀臣敬奉遺文謹遵先範分為八卷勒成一
部百氏紕繆雖未可窮六典迂訛於斯矯革謹齋詣闕
奉表以聞輕觸威嚴伏深震悚永徽二年十二月八日
符璽郎臣顏揚庭上

勅旨顏師古業綜書林譽高詞苑討論經史多所匡正
前件書發明故事諒為博洽宜令所司錄一本付秘書
閣仍賜其子符璽郎揚庭絹五十匹永徽三年三月十

五日中書侍郎來濟宣

--	--	--	--	--	--	--	--

欽定四庫全書

匡謬正俗卷一

唐 顏師古 撰

論語公冶長篇云子貢曰夫子之文章可得而聞也夫子之言性與天道不可得而聞已矣蓋言夫子刪詩書定禮樂讚易道脩春秋所有文章並可聞見至於言性命之事及言天道不可得而聞之故論語云子罕言利與命與仁又曰子不語怪力亂神李路問事鬼神子曰

未能事人焉能事鬼曰敢問死子曰未知生焉知死並其義也而近代學者乃謂夫子之言語性情並與天道合所以不可得而聞離文析句違經背理綴文之士咸作此意用之大為紕繆若言夫子之言不可得聞者論語二十篇所述夫子言語何從而得又不應語弟子云予欲無言

攘或問曰論語云直躬之父攘羊注云攘盜也何以謂盜為攘更有何義荅曰按爾雅云攘仍因也書云紂攘

矯虔即其事也

風毛詩序云關雎后妃之德也風之始也所以風天下而正夫婦也今人讀風為諷天下案序釋云上以風化下下以諷刺上此當言所以風天下不宜讀為諷又云風風也教也風以動之教以化之今人讀云風以動之不作諷音案此蓋序釋風者訓諷訓教諷刺謂自下而上教化謂自上而下今當讀云諷以動之不宜直作風也

架詩鄭氏箋云鵲之有巢冬至加功至春乃成此言始起冬至加功力作巢蓋直語耳而劉昌宗周續等音加為架若以構架為義則不應為架功也

夾又詩傳曰山夾水曰澗此引爾雅正文言兩山夾水名之為澗居然可曉而劉周之徒又音夾為頗於義無取亦為專輒

縮問曰鄘詩牆有茨篇云中菁之言不可讀也毛詩傳云讀抽也抽是何義荅曰讀止謂道讀之讀更訓為抽

翻成難曉按許說文解字曰籀讀也從竹榴聲榴即古
抽字是以籀或作籀蓋毛公以籀解讀傳寫字省故止
為抽此當言讀籀也不得為抽引之義又左氏傳云其
繇曰專之渝其繇曰士刳羊之類字雖為繇音訓皆作
籀並未讀卜筮卦繇之辭也

甲衛詩光蘭篇云能不我甲毛詩傳曰甲狎也毛公此
釋蓋依爾雅本訓而徐仙遂音甲為狎案甲雖訓狎自
有本音不當便讀為狎譬猶數字訓厭葛覃篇云服之

金匱要略卷一
無數豈得讀云服之無厭乎若以甲有狎音假借為字者不應方待訓詁始通其義也

背伯兮篇云焉得諼草言樹之背毛傳云背北堂也謂於堂北種之以忘憂耳而陸士衡詩云焉得忘憂草言樹背與襟便謂身體前後種之此亦誤也

溥鄭詩野有蔓草篇云野有蔓草零露漙漙兮有美一人清揚婉兮詩古本有水旁作專字者亦有單作專字者後人輒改為之漙字讀為團圓之漙作辭賦篇什用之

遞相因襲曾無疑者按呂氏字林雨下作專訓云露貌
音上充反此字本作霽或作溥耳單作專者古字從省
又上充之音與婉相類益知呂氏之說可依本非團義
矣下云零露漙漙者豈復亦論其從橫之貌乎

衡齊詩南山篇云蓺麻如之何衡從其畝禮云古之冠
縮縫今也衡縫衡即橫也不勞借音而徐氏並音為橫
皆失之矣

叨甫田篇云勞心忉忉爾雅音切切憂也後之賦者叙

憂慘之情多為忉怛王仲宣登樓賦云心悽愴以感發
意忉怛而慙惻諸如此類皆當音切字與忉字相類切
字從刀匕聲傳寫誤亂或變為忉今之學者諷誦辭賦
皆為忉怛不復言切失之遠矣

矜小雅鴻鴈篇序云至于矜寡無不得其所焉徐仙音
矜為古頑反案此詩當章言矜及矜人哀此鰥寡故鄭
箋云當及此可憐之人謂貧窮者欲令賙餼之鰥寡則
哀之其孤獨則收斂之使有依也尋序及詩意蓋云可

矜憐之人及鰥寡者皆被勞求安集鄭箋釋之正得其理而徐氏讀矜為鰥既無所憑大失本旨

央庭燎篇云夜未央傳云央旦也鄭箋云夜未央猶言未渠央也按秦詩蒹葭篇云宛在水中央禮月令云中央並是中義許氏釋文解字云央中央也一曰久是則夜未央者言其未中也未久也今關中俗呼二更三更為夜央夜半此蓋古之遺言謂夜之中耳毛公訓央為旦亦未知出於何典而鄭君直釋云未渠央不解未渠

何義按俗語云未渠央亦言未遽央遽與渠同言未遽中耳古詩云調絃未遽央即是其事康成不能指明其義而更曲引未渠云復加以猶言如博依之說適令學者不曉其意

號北山篇云或燕燕居息或盡瘁事國或息偃在牀或不已於行或不知叫號或慘慘劬勞或棲遲偃仰或王事鞅掌或湛樂飲酒或慘慘畏咎從上及下句句相韻叫號者猶言誼呼自恣耳非必要謂號咷之號毛傳云

叫呼號召也而徐仙乃音號為呼到反今讀者遵之亦甚非也

享楚茨篇云以享以祀以介景福鄭箋云享獻也又信南山篇云享于祖考大田詩亦云以享以祀其義並同此自可曉而徐仙並音享為許亮反未審其意

賚楚茨又云祖賚孝孫毛傳云賚予也徐仙音賚為來亦所未詳

莫大雅皇矣篇云皇矣上帝臨下有赫監觀四方求民

之莫毛傳云莫定也鄭箋云求民之定謂所歸就也又
桑柔篇云苑彼桑柔其下侯甸捋采其劉瘼此下民捋
采之則葉爆爍而疏人息其下則病於爆爍喻羣臣恣
放損王之德也而末代文士引求民之莫以屬辭者改
莫為瘼從而釋之云求瘼謂其疾苦耳至乃呼刺舉宰
牧為求瘼既易本字妄為臆說安施失所比喻乖方相
承用之曾無覺悟雖采酌經詁而大違厥旨亦為巨謬

匡謬正俗卷一

欽定四庫全書

匡謬正俗卷二

唐 顏師古 撰

尚書孔安國古文尚書序云先君孔子生於周末覩史籍之煩文懼覽者之不一遂乃定禮樂明舊章覽者謂習讀之人猶言學者爾蓋思後之讀史籍者以其煩文不能專一將生異說故刪定之凡此數句文對旨明甚為易曉然後之學者輒改之字居者字上云覽之者不

一雖大意不失而顛倒本文語更凡淺又不屬對亦為
妄矣今有晉宋時書不被改者往往而在皆云墮者之
不一又云以所聞伏生之書定其可知者為隸古定更
以竹簡寫之蓋言以孔氏壁中科斗文字依傍伏生口
傳授者考校改定之易科斗以隸古字定訖更別以竹
簡寫之非復本文也近代淺學乃改隸古定為隸古字
非也按直云隸古即是隸古字於理可知無所闕少定
者為定訖耳今先代舊本皆為隸古定不為古字也

劓

古文
戮字

商書湯誓

古誓
字

云予則劓汝孔安國傳云古

之用刑父子兄弟罪不相及今云劓戮權以脅之使勿
犯也按劓戮者或以為奴或加刑戮無有所赦耳此非
劓子之劓猶周書泰誓稱囚劓正士亦謂或囚或劓也
豈得復言并子俱囚

一無
囚字

也又班固漢書季布傳贊云

及至困亢奴僇苟活蓋引商書之言以為折衷矣

御周書牧誓篇云弗御克奔以役西土孔安國注云商
衆能奔來降者不迎擊之如此則所以役我西土之義

徐仙音御為五所反按御既訓迎當音五駕反不得音
御商書盤庚云予御績乃命於天詩鵲巢云百兩御之
訓解亦皆為迎徐氏並作音訝何乃牧誓獨為禦音又
與孔氏傳意不同失之遠矣

豳武成序云武王伐殷往伐歸豳孔安國注云往誅紂
克定偃武修文歸馬牛於華山桃林之牧地徐仙音豳
為始售反按武成當篇云歸馬於華山之陽放牛於桃
林之野此與序意相承又許氏釋文解字云豳豳也字

林罍音火又反獸字從罍從犬斯則六畜之字本自作
罍於後始借養字為耳且罍獸類屬不同罍者人之所
養獸者是山澤所育故爾雅論牛馬羊豕則在釋畜論
麋鹿虎豹即在釋獸較然可知若武王歸鹿華山之陽
放虎桃林之野可言歸獸所歸放者既是馬牛當依罍
字本音讀之不得以作獸字一邊便謂古文省簡即呼
為獸且堯典云鳥獸孳尾鳥獸毛毳鳥獸希革鳥獸毳
毛旅獒云珍禽奇獸不育于國皆作獸字不作罍也何

獨武成一篇以畧為獸斯不然矣

夾多方篇云爾害弗夾介乂我周王享天之命孔安國
注云夾近也汝何不近大見治於我周王以享天之命
而為不安乎徐仙音夾為協按夾既訓近音陘不得讀
為協也

關費誓序云魯侯伯禽宅曲阜徐夷

一作

並興東郊不

關孔安國注云徐戎淮夷並起為寇於東故東郊不開
徐仙音開按許氏說文解字及張揖古今字詁林開

字開古闕字但闕既訓開故孔氏釋云東郊不開爾不得徑讀闕為開亦猶蔡仲之命云乃致辟管叔于商孔安國注云致法謂誅殺也豈得即音辟為法乎此例多矣

惟惟辭也蓋語之發端書云惟三月哉生魄惟十有三祀王訪于箕子之類是也古文皆為惟字而今文尚書變為維者同音通用厥義無別又詩云价人維藩大師維垣大邦維屏大宗維翰懷德維寧宗子維城此亦是

辭語之助與書之列爵惟五分土惟三任官惟賢才左
右惟其人於理無別然今文學之士不詳立語之體古
今字變因爾穿鑿妄生義理製冊文哀誄祭文其唱首
云維某年月日者既不為惟字自作釋云此字是維持
一篇之首故為綱維之字又言宗子維城謂藩屏維繫
連城之義耳乃呼帝子弟為王者為藩維既無所據不
知本是助辭大為謬矣譬若詩云維師尚父番維司徒
維彼哲人此類多矣皆為維字豈連繫之義乎且爾雅

云伊維侯也三者並發語之辭詩云伊其相諶我罪伊何伊予胡底侯誰在矣侯薪侯蒸並與維同義寧當更有別說斯不然矣

烏呼嗚呼歎辭也或嘉其美或傷其悲其語備在詩書不可具載但古文尚書悉為於戲字今文尚書悉為嗚呼字而詩皆云於乎字中古以來文籍皆為嗚呼字文有古今之變義無美惡之別末代文字輒為體例若哀誅祭文即為嗚呼其封拜冊命即為於戲於讀如字戲

讀為義謂嗚呼為哀傷於戲為歎美非止新有屬綴設此二端乃亦諷讀舊文分為兩義妄為穿鑿不究根本按大雅云於乎小子未知臧否豈非傷王不知善否乎周頌云於乎前王不忘非美先王之見稱頌乎五子之歌云嗚呼曷歸予懷之悲此即哀傷之語賡征云嗚呼威克厥愛允濟此即褒美之辭何以各別為字也且漢武冊命三王文皆曰嗚呼此豈哀傷之義舉其大意斷可知矣且許氏說文解字及李登聲類並云於即古烏

字耳

匡謬正俗卷二

欽定四庫全書

匡謬正俗卷三

唐 顏師古 撰

禮記曲禮云禮聞取於人不聞取人鄭元注云取於人謂高尚其道取人謂制服其身此義較然可曉而徐仙音取於人為娶浪為假借矣

一本娶作聚

奉又云奉長者之手入戶奉扁奉席如橋衡凡如此例奉者皆為恭而持之於義足了今皆讀為捧音數奉反

亦浪為假借也

拾又云拾級聚足此言升階歷級每一級則並足然後更登也拾者猶言一一拾取而鄭康成讀拾為涉近乎穿鑿

禹字丘區或問曰曲禮云禮不諱嫌名鄭注云嫌名即禹與字丘與區其義何也荅曰康成鄭君此釋蓋舉異字同音不須諱耳區字既是故引為例禹字二字其音不別丘之與區今讀則異然尋按古語其聲亦同何以

知之陸士衡元康四年從皇太子祖會東堂詩云巍巍
皇代奄宅九圍帝在在洛克配紫微普厥丘宇時罔不
綏又晉宮閣名所載某舍若干區者列為丘字則知區
丘音不別矣且今江淮田野之人猶謂區為丘亦古之
遺音也今之儒者不曉其意競為解釋或云禹字是同
聲丘區是聲相近二者並不須諱並為詭妄或云字禹
區丘並是別音相近乃讀禹為于舉反故不須諱並為
詭妄不詣其理

予鄭元注曲禮下篇予古余字因鄭此說近代學者遂
皆讀予為余案爾雅云卬吾台予朕身甫余言我也此
則予之與余義皆訓我明非同字許慎說文予相推予
也余詞之舒也既各有音義本非古今字別詩云追天
之未陰雨徹彼桑土綢繆牖戶今女下民或敢侮予又
曰終其永懷又窘陰雨其車既載乃棄爾輔載輸爾載
將伯助予又曰習習谷風維風及雨將恐將懼維予與
女將安將樂女轉棄予又雲漢篇云羣公先正則不我

助父母先祖胡寧忍予楚辭云帝子降兮北渚目眇眇
兮愁予嫋嫋兮秋風洞庭波兮木葉下又曰君回翔兮
來下踰空桑兮從女紛惓惓兮九州何壽夭兮在予又
曰秋蘭兮麝蕪羅生兮堂下綠葉兮素枝芳菲菲兮襲
予夫人自有兮美子蓀何以兮愁苦歷觀詞賦予無余
音若以書云予一人禮曰余一人便欲通之以古今字
至如夏書云非台小子敢行稱亂豈得便言台余古今
字耶邶詩云人涉卬否卬須我友豈得又言卬我古今

字乎

葬檀弓云杜氏之葬在西階之下葬謂葬處而乃讀葬

為葬

才浪反

亦為穿鑿

離月令云孟春之月乃命大史守典奉法司天日月星辰之行宿離不忒無失經紀以初為常鄭康成注云離讀如儷按易之離卦彖辭曰日月麗乎天百穀草木離乎土今云宿離不忒宿即星辰離則日月蓋覆上言星辰日月耳更無別義居然可曉何為改離作儷若然者

離卦亦可以變為麗卦乎

祝曾子問曰祝聲三告曰某之子生敢告鄭康成云聲噫歆警神也此蓋解聲三者謂三稱噫然後言某之子生耳而徐仙之徒並音祝為祝之又學者相承遵之並大誤也

五方之兵又云如諸侯皆在而日食則從天子救日各以其方色與其兵鄭康成注云示奉時事有所討也方色者東方衣青南方衣赤西方衣白北方衣黑其兵未

聞按黃帝素問及淮南子等諸書說五方之兵東方其兵矛南方其兵弩中央其兵劍西方其兵戈北方其兵鍛蓋謂隨方色衣其衣執其兵以救耳

殺郊特牲云大夫而饗君非禮也大夫強而君殺之義也由三桓始也鄭元注云慶父通於夫人以脅公季友以君命鳩牙後慶父殺二君而又死又按殺讀為降殺之殺謂衰弱也此言大夫不當饗君自三桓已來大夫強而君弱是以有君就饗于大夫者耳此一段禮文相

承躡惣論饗覲之事故其下惣云天子徵諸侯偕大夫
強諸侯脅相貴以等相覲以貨相賂以利而天下之禮
亂矣不言誅戮之事安取其鳩牙殺慶父哉

楊又鄉人楊

音傷

孔子朝服立于阼階鄭元注云楊強鬼

也謂時儺索室毆疫逐強鬼也楊或為獻或為儺而徐
仙音楊為儺今讀者遂不可言楊亦失之也

羶又云既奠然後炆蕭合羶鄉此言蕭炆以脂合黍稷
燒之羶者脂氣鄉者黍稷氣於義自通而康成乃云羶

當為馨字之誤亦為迂曲矣

辟又云祭有所焉有報焉有由辟焉康成解云辟讀為
弭謂弭災兵也按辟當讀為辟邪惡之辟直云辟災
義自可曉無容假借

溫內則云問所欲而敬進之柔色以溫之鄭康成注云
溫藉也承尊長必和顏色也案直云柔和顏色以溫悅
尊長之心不當改讀為蒞也

嘯又男子入內不嘯不指夜行以燭鄭康成注云嘯讀

為叱嫌有隱使也案嘯者謂若有所召命密相諷誘若齊莊撫楹而歌耳何為乃云叱乎詩云嘯歌傷懷念此碩人即其義也

蝸又云蝸醢而苾食蝸者羸之類耳而徐仙等音蝸為羸亦未為達

卵又曰濡香卵醬實蓼鄭康成注云卵讀為鯢也案卵者魚卵即是魚子不勞改讀為鯢魚子也

有又云凡養老五帝憲三王有乞言直謂五帝養之為

法其德行而不乞言三王既憲法而有乞言之禮鄭康成乃讀有為又蓋亦不勞假借也

孽玉藻云世子自名嬖者曰寡君之適公子曰臣孽鄭康成云孽當作柝聲之誤也按孽者是庶孽既非適子故自云孽不當言柝柝者斷而復生豈人子之所宜自稱乎

不至坊記云昏禮壻親迎見於舅姑舅姑承子以授壻恐事之違也以此坊民婦猶有不至者鄭康成注云不

至不親夫以孝舅姑也春秋成公九年春二月伯姬歸
于宋夏季孫行父如宋致女是時宋恭公不親迎恐其
違而授之按不至者謂淫佚之風女雖未嫁已從奔誘
及壻親迎猶在他室而不至焉按陳詩東門之楊序曰
昏姻失時男女多違親迎女猶有不至者也其詩曰東
門之楊其葉牂牁昏以為期期而不至即其事也康成
詩箋云親迎之禮以昏時女留他色不肯時行乃至大
星煌煌然為得其義何為注禮乃更妄生異說豈非矛

盾之論哉

素食喪服傳記云既虞飯疏食水飲既練食菜果飯素食鄭康成注云素猶故也謂復平生時食也按素食謂但食菜果糗餌之屬無酒肉也禮家變節漸為降殺始喪三日不食卒哭之內朝夕各一溢米為粥而已既虞疏食水飲疏食謂麤疏之飯單率之菜食不復粥又非止一溢也既練遍食菜果酸醎但無酒肉之屬既除喪始食乾肉飲酒然後乃復平生時食耳此是禮經明文

安得始練便復平生故食乎又班書霍光傳載光奏昌
邑王過失云典喪服斬衰無悲哀之心廢禮誼居道上
不素食王莽傳云每有水旱莽輒素食左右以白太后
遣使詔莽曰聞公菜食憂民深矣今秋幸熟公勤於職
幸以時食肉據此益知素食是無肉之食非平生食也
今俗謂喪門齋食為素食蓋古之遺語焉

匡謬正俗卷三

欽定四庫全書

匡謬正俗卷四

唐 顏師古 撰

春秋苻者旌旗之苻字從𠂔

音

訓與旒同桓二年臧哀

伯云輦厲苻纓是也學者不尋其本讀苻為旒浪為假借徐仙亦作旒音況其他乎

俘莊六年經書齊人來歸衛俘傳言衛寶公羊穀梁經並為寶杜預注云疑左氏傳經誤案爾雅云俘取也書

序云遂伐三股俘厥寶玉然則所取於衛之寶而來獻之經傳相會義無乖爽豈必俘即是人杜氏之說為不通矣

肉食莊十年曹劌之鄉人謂劌曰肉食者謀之又何間焉對曰肉食者鄙未能遠謀此鄉人見劌欲論軍所以諫云卿大夫自當謀之非卑淺者所當關預劌即荅云當今卿大夫識見鄙薄未能遠謀我所以須見君論之耳而今流俗皆謂凡是食者灸者即合志識昏蔽心慮

憤濁不堪謀事故須蔬食菜羹襟神明悟為之也至乃
遽相戲弄以為口實不亦謬乎

寺人寺人者內小臣在壺闈庭寺之中謂閹人耳詩云
寺人孟子左傳云寺人披寺人貂之類是也侍人者謂
當時侍衛於君不限內外猶言侍者耳左傳云侍人賈
舉侍人僚祖之類是也近代學者不詳其義皆讀寺人
同為侍人斯則失矣至如仲尼居曾子侍平公飲酒師
曠李調侍豈得謂閹豎乎

鷓鴣二十四年鄭子華之弟子臧出奔宋好聚鷓鴣冠杜
預注云聚鷓鴣羽以為冠非法之服也鄭伯聞而惡之杜
預注云惡其服非法之服也使盜誘而殺之於陳宋之
間君子曰服之不衷身之災也詩云彼已之子不稱其
服子臧之服不稱也夫按鷓鴣水鳥天將雨即鳴即戰國
策所稱鷓鴣蚌相謂者也古人以其知天時乃為冠象此
鳥之形使掌天文者冠之故逸禮記曰知天文者冠鷓
此其證也鷓鴣字音聿亦有衎音故禮之衣服圖及蔡邕

獨斷謂為術氏冠亦因鷖音轉為術字耳非道術之謂也蓋子藏是子華之弟以兄見殺怨而出奔有白公之志故與知天文者遊聚有所圖議是以鄭伯恐其返國作亂令誘殺之若直以鷖羽飾冠自為不正之服何須畏惡而遣殺之若直謂出見殺又不應云服之不衷且傳言楚子翠被蓋知聚字非屬冠也或者自君子曰以下非止明本傳後人不曉鷖冠之義妄加增之而杜氏之釋從而僻其義也

軒僖二十八年晉師入曹數之以其不用僖負羈而乘
軒者三百人也且曰獻狀杜預注曰言其無德居位者
多矣故責其功狀也按昔重耳過曹曹共公不禮聞其
駢脅薄而觀之晉文懷恥以為深怨今既乘勝志在報
雪尚託公義故先責不用負羈而乘軒者衆因曰今我
之來獻駢脅容狀耳斯蓋嗤弄之言猶言若云謂秦拜
賜之師也豈責乘軒功狀乎

王夫襄五年楚公子王夫字子辛今之學者以其字子

辛遂改王夫為壬夫同是日辰名字相配也按楚有公
子午字子庚庚是日干午是十支法有相配或者此人
以庚午歲若庚午日生故名庚字子午耳辛壬同是十
幹若以辛生則不得名壬若以壬生則不得字辛此與
庚午不相類固當依本字讀為王夫不宜穿鑿改易為
壬也譬天王之弟佞夫孔氏之宰渾良夫治區夫之屬
各自有義豈曰配日辰乎

閔闕襄三十一年子產相鄭伯如晉子產使盡壞其館

之垣而納車馬焉士文伯讓之曰敝邑以政刑之不修
寇盜充斥無若諸侯之屬辱在寡君者何是以令吏人
完客所館高其閤閤厚其墻垣以無憂客使杜元凱注
云閤門也徐仙閤音宏今吾子壞之雖從者能戒其若
異客何對曰今銅鞮之宮數里而諸侯舍于隸人門不
容車而不可踰越杜元凱注曰門庭之內迫迮又有墻
垣之限爾雅云所以止扉謂之閤郭景純注曰門辟旁
長櫪也左傳曰高其閤閤按若館門實高而直庭內迫

進者即當云庭不容車不應云門也又高為門戶非關
止盜之方文伯不應云以無憂客使若門得車入則子
產止須引車入門致室屋之下何勞壞垣云不可踰越
蓋是門既不大而止扉又高以牢固捍禦寇賊子產為
其不容車入故壞垣耳尋文究理郭說得之但闕與門
二字相似流俗轉寫致有混謬杜君不加詳覈就而通
之未為允當

草創襄二十一年子羽與裨諶乘以適野而謀於野則

獲於邑則否按論語稱孔子云為命裨諶草創之世叔
討論之行人子羽脩飾之東里子產潤色之是謂裨諶
發慮創始為之辭意世叔尋討而論叙之子羽子產脩
飾潤色然後成耳草創者猶言草昧蓋初始之謂矣又
曰草者藁草亦未成之稱安在適草野則能在都邑則
不就若然者討論豈尋干戈乎潤色豈膏澤乎此亦是
後人所加非正明本傳也

匡謬正俗卷四

欽定四庫全書

匡謬正俗卷五

唐 顏師古 撰

史記司馬子長撰史記其自叙一卷惣歷自道作書本
意篇別皆有引辭云為此事作某本紀為此事作某年
表為此事作某書為此事作某世家為此事作某列傳
子長此意蓋欲比擬尚書叙耳即孔安國所云書序序
所以為作者之意也楊子雲著法言其本傳亦傳法言

之目篇篇皆引辭云撰某篇亦其義也及班孟堅為漢書亦故其意於叙傳內又歷道之而謙不敢自謂作者避於擬聖故改作為述然叙致之體與馬揚不殊後人不詳乃謂班書本贊之外別更為覆述重申褒貶有所歎詠摯虞撰流別集全取孟堅書序為一卷謂漢述已失其意而范蔚宗沈休文之徒撰史者詳論之外別為一首華文麗句標舉得失謂之為贊自以取則班馬不其惑歟劉軌思文心雕龍雖略曉其意而言之未盡

漢書高紀云大澤之陂按孔安國尚書傳曰障水曰陂然則陂者本因隄防壅遏故得名耳大澤者地形之總名陂者是隄防之指號蓋謂當時之媪於大澤之內陂塘止息流俗乃云防是水中不得止息強讀為陂失其意也

尚惠紀云尚公主易曰得尚于中行王弼注云尚猶配也說者云尚者主也引尚書為類或云尚者掌也謂守掌之皆非其義公主既尊止得云侍奉不可以主掌為

稱弼說是也

赦令哀紀云甲子詔書非赦令皆除之按哀帝初用夏
賀良言改年定歷下詔施行其事并開恩惠赦宥罪人
後知賀良詭惑收正其事依舊歷追悔前非但所赦人
不可更覆與罪所以云甲子詔書除赦令以外歷及刻
漏事一皆除之耳蓋言甲子詔書除是赦令總遣除之
今書本令字或作他言赦令以外其他餘事皆改除之
兩讀為得

緡食貨志云藏緡謂繩貫錢故總謂之緡耳文云算緡亦云以緡穿錢故謂貫為緡也而後之學者謂緡為錢乃改為緡字無義可據殊為穿鑿按孔子云四方之人緡負其子而至謂以繩絡而負之故謂緡褌耳豈復關貨泉耶

逡遁賈誼過秦云嘗以十倍之地百萬之衆仰關而攻秦秦人開關延敵九國之師逡遁而不敢進秦無亡矢遺鏃之費而天下已困矣遁者蓋取盾之聲以為巡字

當音詳遵反此言九國地廣兵強相率西嚮仰形勝之地
沂函谷之關欲攻秦室秦人恃其險固無懼敵之心
不加拒閉開關而待然九國畏悞自度無功持疑不進
坐致敗散耳後之學者既不知道為巡字遂改為遁逃
因就釋云九國初見秦閉關謂其可勝所以率兵來攻
忽見秦人開關各懷恐懼遂即奔走故潘安仁西征賦
云或開關而延敵競遁逃以奔竄斯為誤矣若見秦開
關遁逃而走即應大被追躡覆軍殺將豈得但言不敢

進而已乎且書本好者今猶為逡遁不作遁逃也

游衣叔孫通傳曰高帝寢衣月出游高廟言高寢之衣冠一月一備法駕出游於高廟耳隋越國公楊素行經漢高陵詩云芳春無獻果明月不游衣觀其此意謂月出之夕乃游衣冠此大謬

郎署馮唐傳云文帝輦過郎署見馮唐而問之郎者當時宿衛之官非謂趣衣小吏署者部署之所猶言曹局今之司農太府諸署是也郎署並是郎官之曹局耳故

劉孝標辨命論云馮都尉皓髮於郎署而今之學者不曉其意但呼令史府史為郎署自作解釋云郎吏行署文書者故曰郎署至乃摘翰屬文咸作此意失之遠矣便面張敞傳云自以便面拊馬按所謂便面者所執持以屏面或有所避或自整飾藉其隱翳得之而安故呼便面耳今人所持縱自蔽者摠謂之扇蓋轉易之稱乎原夫扇者所用振揚塵氛來風卻暑鳥羽簞可呼為扇至如歌者為容專用掩口侍從擁執義在障人並得扇

名斯不精矣今之車輦後提扇蓋便面之遺事與按桑
門所持竹扇形不圓者又便面之舊制矣

柱西域傳云當為柱置心不便按柱者撐柱之名本音
竹羽反柱物之本因為之柱竹具反魯靈光殿賦云漂
嶢峴而枝柱此音是也車後柱木呼為車柱其義亦同
置者安設之名言柱置者謂自安置支拄他人今江南
俗呼人自高抗矜持為自柱置今此言車師國見徐普
於其側近柱置恐被侵拒故心內以為不便耳安在其

取椽柱而置於心腹中乎義既乖刺語又析破失之遠矣朱雲連柱五鹿君豈復齋椽自隨乎

非一揚雄叙甘泉宮云遊觀屈奇瓌瑋非木摩而不雕牆塗而不畫此言既甚屈奇瓌瑋不合於上古之世摩而不雕塗而不畫采椽茅茨儉約之制耳今之書本好者猶然而後人輒於非字下加一字讀云瓌瑋非一竟不尋下句直云木摩而不雕是何言歟

葵酷吏傳長安中歌云安所求子死桓東少年場生時

諒不謹枯骨復何葬荀卿禮賦云非絲非帛文理成章
非日非月為天下明生者以壽死者以葬城郭已固三
軍已強說苑云吾嘗見稠林之無木平原之為谷君子
無侍僕江河乾為阮正冬采榆桑仲夏雨雪霜千乘之
君萬乘之王死而不葬據韻而言則葬字有臧音矣

阡原涉傳云涉父為南陽太守死涉讓還南陽賻送由
是顯名涉自以為身得其名而先令墳墓儉約非孝也
乃大起冢舍周閣重門初武帝時京兆曹氏葬茂陵曹

氏謂其道阡涉慕之乃買地開立表署曰南陽阡

桓如淳漢書音義曰舊亭傳於四角面百步築土上有
屋屋上有柱出高丈餘有大板貫柱四出名曰桓表縣
所都夾兩邊各一桓陳留之俗言桓聲如和今猶謂之
和表也說文云桓是亭郵表也東京賦云迄于上林結
徒為營叙和樹表司鐸授征叙比也軍之正門為和樹
表設牙形以表之

辟彊外戚傳留侯子張辟彊前賢亦無釋而學者相承

讀辟音如珪璧之璧彊為彊禦之彊作意解云能珪辟
彊禦猶言辟惡邪辟兵之類是也東齊僕射陽休之為
兒制名亦取此按賈誼新書云昔者衛侯朝于周周行
人問其名曰衛侯辟彊周行人還之曰啟彊辟彊天子
之號也諸侯弗得用衛侯更其名曰燬然後受之若如
賈生此說辟當音為開闢之闢彊當音為彊場之彊楚
有遠啟彊亦其例也古單用字多有假借不足為疑又
漢濟南王名辟光世人亦讀為璧復解釋云辟君也恐

此亦當取開闢之義為勝

閼氏習鑿齒與謝安石書云匈奴名妾作閼氏言可愛如烟支也閼字於言反想足下先作此讀書也按史記及漢書謂單于正妻曰閼氏猶中國言皇后爾舊讀音焉氏此蓋北翟之言自有意義未可得而詳也若謂色象烟支便以立稱者則單于之女謂之居次復比何物且閼氏妻號非妾之名未知習生何所憑據自謂解釋隄凡言提封者謂提舉封疆大數以為率耳後之學者

不曉輒讀提為隄著述文章者徑變為隄字云惣其隄防封界故曰隄封按封籍之體止舉大數定其綱陌其言封者譬畧堰埒以知頃畝何待堰堤然始立畔乎正當依其本字讀之不宜曲生異說也又隄防之隄字並音丁奚反江南末俗往往讀為大奚反以為風流恥作低音不知何所憑據轉相效習此弊漸行於關中其提封本取提挈之義例作低音而呼隄防之字即為蹄音而失其義良可歎息傳曰君子於其所不知蓋闕如也

苟不明練豈宜臆說以誤將來

陂池東觀漢記述光武初作壽陵云今所制地不過二三頃為山陵陂池裁令流水而已按陂池讀如弔二世賦登陂陲之長坂凡陂陲者猶言靡陲耳光武言不須如前世諸帝高作山陵但令小隆起陂陲然裁得流泄水潦不墊壤耳今之讀者謂為陂池今得流水此讀非也

楊豫謝承後漢書楊豫傳云豫祖父惲封平通侯惲子

會宗坐與臺閣交通有罪國除家屬皆徙酒泉郡又載
豫上書乞還本土其辭云臣祖父惲念安社稷忠不避
難指刺奸臣實心為國遂致死徙按班書楊敞傳其載
惲與太僕戴長樂相失惲與長樂皆免為庶人惲既失
爵位家居營產業起室宅以財自娛其友人安定太守
西河孫會宗與書諫戒之惲內懷不伏報會宗書辭語
不遜宣帝見而惡之惲坐腰斬妻子徙酒泉郡此惲先
失爵位然後被誅妻子被徙據敞傳及豫上書數說皆

同更無所異安得有子名會宗襲爵國除被徙事乎謝氏既不詳其本稱引會宗失於故實又自載豫上書與叙事相背交為矛盾二三詭錯

計偕凡舉事立稱當依義理若遵古昔須得其衷班書武帝元光五年徵吏民有明當世之務習先聖之術者縣次續食令與計偕此言所徵之人縣別給食令上計之使俱詣京師耳而晉朝謂計薄為計階薄意欲酌於故實乃所以彰其謬陋變偕為階了無義旨

戎昭果毅左氏傳曰戎昭果毅克敵為果致果為毅此
言理戎之禮須明果毅而江南陳國制立官名有戎昭
將軍果毅將軍此亦不經之甚譬易稱師出以律豈可
便置師出將軍乎

宋書宋高祖弟道鄰道規二人同以道為名而鄰規各
有別理史牒誤為憐字讀者就而呼之莫有知其本實
余家嘗得宋高祖集十卷是宋元嘉時秘閣官書所載
道鄰字始知憐者是錯原其立名既有道規即應頗存

義訓不應苟取憐愛而已

熹熹熾盛也音與僖同故後漢趙熹字伯陽取此義耳
末世傳字誤為喜字讀者不救因呼為熹宋高祖婦之
兄弟臧熹昆季二人名從火喜亦音僖今人又謬為熹
字而讀之為喜皆失其意沈約撰宋書乃更為熹制字
以配欣喜之名是穿鑿也余家所得宋高祖集作臧熹
字此明驗也且喜下施心是好熹之意音虛記反不謂
之熹也

錫趺蕭子顯齊書云太祖在淮修理城得一錫趺大數尺趺下有篆文莫能識者紀僧真曰何須辨此文字此自久遠之物九錫之徵太祖曰卿勿妄言而顧野王撰符瑞圖據子顯齊書錄此一條錫趺謂錫趺亦具寫子顯書語但易趺字為玦字乃畫作玦形按此趺者謂若箕箕之趺今之鐘鼓格下並有之耳故其大數尺而有篆文安有論玦大小直云數尺為道廣狹為舉麤細乎又玦之體狀若半環以何為上以何為下而云下有篆

字此之疎謬不近人情野王之於子顯年載近接非為
遼賈且又跌之與玦形用不同若別據他書容有異說
蕭氏乖戾則失不在顧矣豈書本乎

蒿艾齊書又云紀僧真夢蒿艾生滿江驚而白之太祖
曰詩人采蕭蕭即艾也蕭生斷流卿勿廣言按爾雅云
蕭一名賴此蕭自是香蒿古之祭禮祈用合脂爇之以
饗神者艾一名冰臺此則今之用灸病者二草名既不
同稱類區別本非一物較然易了設使齊高謬談取會

一時之應子顯不當著於史籍以誤將來學者詩云彼
采芻兮一日不見如三月兮彼采蕭兮一日不見如三
秋兮彼采艾兮一日不見如三歲兮此之三章蓋詩人
歷言芻也蕭也艾也以為興喻故毛傳云芻所以為締
綌蕭所以供祭祀艾所以療疾豈得又言芻與蕭艾總
為一物乎未聞以艾饗神用蕭灸病斷可知矣

匡謬正俗卷五

欽定四庫全書

經部

匡謬正俗卷六

八至

詳校官國子監祭酒臣覺羅言善

洗馬臣王坦修覆勘

覆校官中書臣康儀鈞

校對官學正臣湯垣

謄錄舉人臣李逢泰

欽定四庫全書

國朝正俗卷六

唐 顏師古 撰

圻或問曰俗呼檢察探試謂之覆圻圻者何也荅曰當
為覆連音敕角反俗語音訛故變為圻耳按晉令成帝
元年四月十七日甲寅詔書云火節度七條云火發之
日詣火所赴救御史關臺令史覆連有不以法隨事錄
坐又云交互連覆有犯禁者依制罰之連者謂超踰不

依次第令所云覆圻亦謂乍檢乍否不依次歷履行之以出其不意耳今謂董卓為董璲故呼連亦為圻是其例也

副副貳之字副字本為福字從衣畐聲今俗呼一襲為一福衣蓋取其充備之意非以覆蔽形體為名也然而書史假借遂以副字代之副本音普力反義訓剖劈字或作醵詩云不圻不副周禮有醵辜並其正義也後之學者不知有福字翻以副貳為正體副圻為假借讀詩

不圻不副乃以朱點發副字已乖本旨又張平子西京賦云仰福帝居東京賦云順時服而設福並為副貳傳寫訛舛衣轉為示讀者便呼為福祿之福失之遠矣蠹淫蠹亂樂按蠹者非法之曲不正之音爾非謂水中蠹之聲也又張平子東京賦云咸池不齊度於蠹咬而衆聽或疑豈謂蠹之聲乃與咸池相似乎是知淫樂之聲矣

恫今太原俗呼痛而呻吟謂之通喚何荅曰爾雅云恫

痛也郭景純音呻同音通亦音恫字或作恫周書云恫
瘝乃身並是其義今痛而呻者江南俗謂之呻喚關中
俗謂之呻恫音同鄙俗言失恫者呻聲之急耳太原俗
謂恫喚云通此亦以痛而呻吟其義一也郭景純既有
呻恫之音蓋舊語耳

洋問曰今山東俗謂衆為洋何也荅曰按爾雅云洋觀
衆衆那多也

略刃問曰俗於礪山出刀子刃謂之略刃有舊義否荅

曰按爾雅云剡略利也張揖古今字詁云古作砮一本作砮未知孰是此則礪刃使利故稱略刃耳

髑問曰俗言濕為塤塤豈濕意乎何以呼之荅曰按說文解字云髑骨間黃汁也字林音丑尼反然則髑是骨間汁故呼濕為髑耳不當為塤裂之字

窠或曰窠寮也別有異意乎荅曰按爾雅云窠寮官也郭景純注云官地為窠同官為寮此則謂卿大夫因官而得食地故謂之采地耳但古之經史采菜相通菜蔬

字頗亦為采文采之字多或作窠非獨地也今之學者見謂之采地字上或加草便為給地以種菜更朋於俳說焉

什器或問曰生生之具謂之什器什是何物荅曰此名原起軍戎遂謂天下通稱軍法五人為伍二五為什一什之內共有器物若干皆是人之所須不可造次而廢者或稱什物猶今軍行戍役工匠之屬十人為火一火內共畜器物謂之幕調度耳

猱或問曰今之戎獸皮可為褥者古號何獸何以謂之戎荅曰按許氏說文解字曰憂貪獸也李登聲類音人周反字或作猱詩云無教猱升木毛傳云猱屬也箋云猱之性善登木爾雅云猱援善援郭景純注曰便攀援也爾雅又云蒙頌猱狀郭注云即蒙貴也狀似雌而小紫黑色猱亦獼猴類耳按郭此說蓋蒙頌為獸狀似猱又上林賦云雌獼飛猱蛭蜩獼猱左思吳都賦云射猱挺劉逵注云猱似猴而長尾尋據諸說驗其形狀戎即

揉也此字既有柔音俗語變訛謂之戎耳猶今之香柔謂之香戎今謂揉別造戕字蓋穿鑿不經于義無取

絢或問曰蒲州盛酒垆謂蒲絢何也荅曰此垆既從遠來運致非易恐其破損故以蒲索纏之按爾雅云絢紃也詩云宵爾索絢即是其義此垆為加蒲索故謂之蒲絢爾

貳或問曰今俗重沓布物一兩次謂之一曳兩曳何也荅曰許氏說文解字云貳重次第物也字林音弋豉反

此則與今所道相當又詩云葛之覃兮施於中谷莫莫
葛藟施于條枚義兼訓移音亦為馳蓋為延覆其上亦
重次第之意焉蓋假借施字為之耳司馬相如上林賦
曰馳丘陵亦其義也俗音訛舛故轉為曳亦猶輕易之
易鄙俗或為曳音究其根本當言一馳兩馳今語亦有
此作俗音者

跌或問曰今山東俗謂伏地為跌何也荅曰跌者俯也
按張揖古今字詁云頻府今俯俛也許氏說文解字曰

頰低頭也太史卜書頰仰字如此斯則呼俯音訛故為
跌耳

俾問曰俗謂聽之使去為不使何也荅曰按爾雅云俾
使也書云有能俾乂詩云俾爾戢穀之類是也故俗云
俾使疾之關音訛若云不使爾

底問曰俗謂何物為底

丁兒反

底義何訓荅曰此本言何

等物其後遂省但言直云等物耳等字本音都在反又
轉音丁兒反左太冲吳都賦云畛畷無數膏腴兼倍原

隰殊品竄隆異等蓋其證也今吳越之人呼齊等皆為
丁兒反應琬詩云文章不經國筐篚無尺書用等稱才
學往往見歎譽此言譏其用何等才學見歎譽而為官
乎以是知去何而直言等其言已舊今人不詳其本乃
作底字非也

剛扛或問曰吳楚之俗謂相對舉物為剛有舊語否答
曰扛舉也音江字或作𢇛史記云項羽力能扛鼎張平
子西京賦云烏獲扛鼎並是也彼俗音訛故謂扛為剛

耳既不知其義乃有造櫛字者因為穿鑿也

欠問曰今人謂物少不充為欠義何所取荅曰許氏釋文解字云歎食不滿也李登聲類呂忱字林並音口憾反今為欠者本為歎耳

木鍾或問曰今所謂木鍾者於義何取字當云何荅曰本呼木章音訛遂為鍾耳古謂大木為章故漢書云貨殖傳云千章之萩謂萩木千枚也其將作屬官有主章署掌材木又古謂舅姑為姑章今俗亦呼為姑鍾蓋知

章音皆稱為鍾

若柯問曰俗謂如許物為若柯何也答曰若干謂且數也禮云始服衣若干尺矣班書云百加若干並是其義干音訛變故云若柯也

楊問曰俗呼姓楊者往往為盈音有何依據答曰按晉灼漢書音義反楊憚為由嬰如此則知楊姓舊有盈音蓋是當時方俗未可非也

椎問曰關中俗謂髮落頭禿為椎何也答曰按許氏說

文解字云髻髮墮也呂氏字林玉篇唐韻並直垂反今俗呼髻音訛故為椎耳

歛問曰今官曹文案於紙縫上署記謂之歛縫者何也
荅曰此語言元出魏晉律令字林本作歛刻也古未有
紙之時所有簿領皆用簡牘其編連之處恐有改動故
於縫上刻記之承前已來呼為歛縫今於紙縫上署名
猶取舊語呼為歛縫耳此義與款不同不當單作款字
耳

埒問曰今俗監檢田畝知其所獲總計大數謂之埒田而官文書乃作耒字其義定何訓解答曰此謂程試頃畝束數以知斛斗多少舉其大故謂之率而率字有律音俗語訛替因謂之埒耳字當作率音宜為律力筆反今人不詳本意為其語涉田農故用耒耜之字非也

聆問曰今俗買瓦器以枚敲之知其全破善惡謂之為聆此義何也答曰按說文解字云聆聽也聲類音力丁反班孟堅幽通賦云妣聆呱而刻石左太沖魏都賦云

二羸之所曾聆是也瓦破壞者聲嘶惡須一一擊而聽之故呼聆瓦耳字當作聆也

誼議或問誼議二字今人讀為宜音得通否荅曰書云無偏無陂遵王之誼無偏無黨王道蕩蕩詩云或湛樂飲酒或慘慘畏咎或出入諷議或靡事不為故知並有宜音

名字或問曰今人或稱字而不稱名其故何也荅曰名以正體字以表德禮云子生三月父始孩而名之男子

二十冠而字故知先名而後字也又云父前子名君前
臣名子於父母則自名據此蓋知常所稱者是名非舉
字也孔子大聖言必稱名且聞有國有家者丘亦恥之
丘未達不如丘之好學也此蓋與弟子等言未有稱仲
尼者其七十弟子及春秋卿大夫固並稱名亦不可勝
載至如漢高祖之潛豐沛人皆謂之劉季項羽之都彭
城舉俗呼為項羽若其自稱則云今邦之業所就孰與
仲多皆將相諸君與籍力也爰種說其季父蓋云絲能

日飲霍顯令淳于衍殺許后云我亦欲報少君此皆舉
字以相崇尚名則其自稱也歷觀古人通人高士言辭
著於篇籍筆跡存乎紙素在身自述必皆稱名他人褒
美則相呼字傳曰周人以諱事神名終將諱之不言諱
字也王父字或以為族不得用名也考諸典故稱名為
是

複名問曰人或複名單稱者於理云何荅曰複名單
稱乃是流俗之事苟遂便易不思立名本旨且依禮文

二名不偏諱今若偏舉安得不諱乎若嫌二名頗多則
舉俗皆須為單名矣至若伯陵稱陵季荊稱荊雖少一
字義或可通又如長壽稱壽延年稱年求其本義已有
所失乃有無恤稱恤不違稱違去病稱病棄疾稱疾白
黑相反更相戲弄隋大業中出勅斷單稱複名深得物
理而委巷之徒不曉其意便謂朝廷禁止單名其幼少
已來不為複名者輒更加增以為順旨曾莫之悟

龔或問曰今為小羊未成為旋

音祥
繼反

子何也荅曰按呂

氏字林云羴音選未辟羊也今言羴者蓋語訛耳當言羴子也

草馬問曰牝馬謂之草馬何也荅曰本以牡馬壯健堪駕乘及軍戎者皆伏阜捭芻而養之其牝馬唯充蕃字不暇服役常牧于草故稱草馬耳淮南子曰夫馬之為草駒之時跳躍揚蹏翹足而走人不能制高誘曰五尺已下為駒故在草中故曰草駒是知草之得名主於草澤矣

匡謬正俗卷六